

共同經課 - 1

列王記上八章一節、六節、十節~十一節、二十二節~三十節、四十一節~四十三節

1 彼時，所羅門聚集以色列的長老及逐支派的首領，以及以色列人許個族長，到耶路撒冷所羅門王殿，欲將耶和華的約櫃對大衛城——就是錫安——運上來。6 祭司扛耶和華的約櫃到伊的所在入彼間厝的後殿，到至聖所，下佇基路兵的翅下。10 當祭司對聖所出來的時，有雲充滿耶和華的殿；11 致到祭司為著雲的緣故袂會倚啲服事，因為耶和華的榮光充滿耶和華的殿。22 所羅門當以色列會眾的面前，倚佇耶和華的壇前，抬起手向天講：23 「耶和華——以色列的上帝啊，佇天頂佇地下，無有上帝親像你守約行仁愛佇你許個奴僕，就是盡心行佇你的面前的；24 你對你的奴僕——我的父大衛所應允的你有守伊。你親嘴講的，親手應驗伊，照今仔日的款。25 耶和華——以色列的上帝啊，你所應允你的奴僕——我的父大衛講：『你的子孫若謹慎 in 的所做，行佇我的面前親像你行佇我的面前，就屬佇你的欲佇我的面前坐以色列的國位，永無斷。』今求你應驗伊。26 以色列的上帝啊，你對你的奴僕——我的父大衛所講的，求你互伊成做實事。27 「上帝真正欲倚起地上嗎？看啊，天及諸個天的天尚且無夠額互你倚起，何況我所起此間殿啊？28 耶和華——我的上帝啊，願你俯落數念你的奴僕的祈禱懇求，來聽你的奴僕今仔日所祈禱佇你面前的求叫祈禱。29 願你日暝看顧此個殿，就是你所講起我的名欲佇遐的所在；來聽你的奴僕所欲向此所在祈禱的祈禱。30 你的奴僕及你的百姓以色列向此所在祈禱的時，願你聽 in 的祈求，願你佇天裡，你倚起的所在來聽 in，你聽見的時就赦免。41 「論到外邦人毋是屬你的百姓以色列，伊為著你的名對遠遠的所在來的，42 （因為 in 聽見你的大名大權能的手，伸出的手）若來向此個殿祈禱，43 願你佇天裡你倚起的所在來聽 in，照外邦人一切所對你求的來行，互天下萬百姓攏識你的名，敬畏你親像你的百姓以色列一樣；閣互 in 知我所起此間殿是用你的名來稱者。

共同經課 - 2

詩篇八十四篇

1 [可拉的後裔的詩，交互樂官。用迦特的樂器。] 萬軍的耶和華啊，你倚起的所在怎樣許通意愛！2 我的心神戀慕耶和華的殿院到昏去；我的心腸，我的肉體向活的上帝求叫。3 萬軍的耶和華——我的王，我的上帝啊，雀鳥仔為著家已尋著一個厝，燕仔為著家已尋著孵子的巢，就是佇你許個祭壇遐。4 倚起佇你的厝的彼號人有福氣！in 欲直直謳佬你。（細拉）5 伊的力在佇你，in 的心意向錫安的大路者，彼號人有福氣！6 in 經過「流目屎」的山谷，互伊變做水泉的所在；閣有秋天的雨的福氣給伊蓋滿。7 in 愈行，氣力愈加添，逐人到錫安朝見上帝。8 萬軍的上帝——耶和華啊，求你聽我的祈禱！雅各的上帝啊，求你俯耳孔來聽！（細拉）9 做阮的盾牌的上帝啊，你著看，看你受抹油者的面！10 佇你的殿院住一日，卡好一千日；寧可佇我的上帝的厝顧門，卡好踎佇歹人的布棚。11 因為耶和華——上帝是日頭，是盾牌，耶和華賞賜恩惠及榮光。伊未曾留一項好物無互許個行正直的人。12 萬軍的耶和華啊，倚靠你的人有福氣！

共同經課 - 3

以弗所書六章十節~二十節

10 結尾來講：恁著惦佇主，及伊氣力的權能來勇壯。11 著穿上上帝全副的戰甲，互恁會倚在來抵敵魔鬼諸個詭計。12 因為咱的交戰毋是抵敵血氣的，就是抵敵諸個辦政事的、諸個掌權的，及此個暗世諸個君王，以及天中歹的神類。13 所以，恁著用上帝全副的戰甲，互恁佇風險的日抵當會住，到恁已經做成攏總的事，也猶原倚在。14 所以著倚伊在用真實結腰，用義做護心鏡，15 用和平福音的備辦穿佇腳裡。16 閣著夯信的盾牌，用此個才會拍滅歹的一切的火箭；17 閣領受拯救的頭盔，以及神的劍，就是上帝的話；18 用逐樣的祈禱及懇求，時時佇聖神來祈禱；警醒佇此個，為著攏總的聖徒懇求無厭倦，19 也替我求，互我會得開嘴，好膽來講互人知福音的奧妙，（為著此個我做掛鐵鍊的欵差，）20 也著求互我佇此個奧妙會好膽照我所應該講的。

共同經課 - 4

約翰福音六章五十六節~六十九節

56 食我的肉、飲我的血的人，伊惦佇我，我亦惦佇伊。57 親像活的父差我，閣我對父來活；食我的，欲對我來活亦是按呢。58 這就是對天降落的餅。毋是親像列祖的食嗎哪也死去，食此個餅的人欲活到永世代。」59 諸個話是耶穌惦佇迦百農會堂來教示人的時所講的。60 伊的學生中多多人聽了，就講：「此個話真摠(oh)，是誰會聽伊？」61 耶穌心內知伊的學生因為此個耦耦唸，就給 in 講：「此個是塞礙著恁嗎？62 設使恁看見人子上到伊原本的所在呢？63 互人活的就是神，肉體就無利益。我所給恁講的話是神，是活命。64 若是恁中間有毋信的人啦。」因為耶穌對起頭就知是誰毋信伊，是誰欲賣伊。65 閣講：「因為按呢，我曾給恁講，若毋是對父互伊，無人會就近我。」66 對按呢，伊的學生多多退去，無閣及伊行。67 耶穌就給十二個學生講：「恁亦欲去嗎？」68 西門彼得應伊講：「主啊，你有永活的話，阮欲去尋是誰啊？69 阮已經信，閣知你是上帝的聖者。」